

**Carlo Roberto Maria Redaelli**

# **IL LIBRI CJATÂT**

**Letare Pastorâl 2019-2020**

Editore Voce Isontina

An 622 prin di Crist a Gjerusalem. Il re Gjosie al à 26 agns. Al è rivât al podê di frut a 8 agns, cuant che i vevin copât il pari Amon intune conzure di palaç. Sedi il re Amon, sedi il nono di Gjosie, il re Manasse ch'al veve guviernât par ben 45 agns a Gjerusalem, si jerin slontanâts da la fede tal Diu d'Israël e a jerin lâts daûr da lis crodincis religjosis dai cananeus e dai assirians (che di lôr a jerin deventâts vassai); a vevin metût i lôr idui tal templi di Salomon e tacât a praticâ la magjie e i sacrificis umans. Gjosie, invezit, al vûl jessi fedêl al Signôr, tornâ a la fede dal popul dal Signôr e restituîi ancje une propre dignitât e autonomie a pet dal podê assirian (profitant dal so progressîf indebiliment in chei agns par colpe in particolâr dai babilonêts). A lui i somee che la prime robe di fâ e sedi liberâ il templi dai idui e restaurâlu. Al incarghe il so fidât ministri Safan di lâ cal sacerdot Chelkie cul ordin di doprâ lis ufiertis cjapadis sù tal templi par paiâ marangons, muredôrs, artiscj e par comprâ legnam e pieris pal restaur. Safan al eseguìs l'ordin dal re, ma il sacerdot Chelkie al à par lui e pal re une sorprese: intant dai lavôrs dal templi al è stât ciatât un libri, il libri da la Leç. Il sacerdot lu consegne a Safan ch'al torne cal re disint: «*I tiei fameis a àn metût für i bêçs [da lis ufiertis] ch'a jerin tal templi e ju àn consegnâts a chei ch'a fasin lis voris, sorintendents al templi dal Signôr*» (2Re 23,9). E al zontà, cuasi ch'al fos un alc di secondari: «*Il sacerdot Chelkie mi à dât un libri*» (2Re 23,10). Il re lu fâs lei a Safan e al capìs ch'al è il libri da l'aleance. Al mande Safan, il sacerdot Chelkie e altris a consultâ la profetesse Culde e al à la conferme che chel al è il libri da la Leç dal Signôr, di masse

timp no osservade. Al decît duncje di aplicâle, rinovant l'aleance cul Signôr, inviant une impuantante riforme religjose e tornant a celebrâ la Pasche ch'e jere stade trascurade aromai di secui.

Parcè ricuardâ chest episodi lontan tal temp? Parcè ch'al dîs tant di chest nestri "vuê" ch'o sin clamâts a vivi come Glesie. Ancje tai nestris agns al è stât ciatât un libri: si trate da la Sacre Scriture, che dopo secui di dismienteance o quasi tal ambit da la Glesie catoliche, e je stade metude di gnûf tal centri da la vite da la comunità cristiane, per efiet in particolâr dal Consei Vatican II. Cumò la Scriture e je deventade fondamentâl par la celebrazion liturgjiche, par la catechesi, par la teologjie, pal magjisteri, pal itinerari spirituâl di singui e di comunitàs e v.i., intune peraule, par ogni aspiet da la Glesie.

Podîno calcolâsi sodisfats? Di sigûr o dovìn ringraciâ il Signôr par chest don fat a la nestre gjenerazion – e che o sàrin clamâts a rindint cont (e chest nus colme di une grande responsabilitât...) –, ma la Peraule dal Signôr consegnade a noaltris da la Scriture no à ancjemò svilupât dute la sô potenzialitât par une vere riforme da la Glesie. Une riforme che, di sigûr, e à dibisugne ancje di sieltis strukturâls, ma ch'e dêf prin di dut basâsi su la Peraule dal Signôr. Se no si limitaressin a justâ il templi, come ch'al jere daûr a fâ Gjosie di prin intro (e al fasarà secui dopo, al inizi dal so itinerari, sant Francesc justant la glesiute di sant Damian), e no invezit a vierzi il cûr e duncje dut di noaltris stes a l'azion da la Peraule e dal Spirt che in jê al fevele.

La nestre diocesi, di un pôcs di agns incà, e cîr di dâi une impuantance particolâr a la Peraule dal Signôr come che dal rest al sucêt par tantis altris diocesis talianis e no dome. Ancje lis letaris pastorâls si son simpri riferidis a la Peraule dal Signôr, cualchidune fasint stât dal dut su libris dal Gnûf Testament: "Ce ch'e je la Glesie" (2013-2014) sui Ats dai Apuestui; "Cui ch'al è il cristian" (2015-2016) sul Vanzeli di Luche; "Il zovin ch'al lave daûr di Gjesù" sul Vanzeli di Marc e ancjemò sui Ats dai Apuestui; "...ancje jo us mandi vô" (2018-2019) sul Vanzeli di Zuan.

Ancje in chest an pastorâl, là che si inviarà la fase principâl da la visite pastorâl in diviersis parochiis, la Peraule dal Signôr e dêf jessi metude tal mieç da la vite da lis nestris comunitâts, da lis fameis, dai singui cristians. La visite pastorâl stesse, par la sô fuarte conotazion missionarie, no podarà che dâ impuantance a la Peraule dal Signôr. Si vûl partant proferî cualchi strument sempliç par ch'e cressi la atenzion a la Peraule dal Signôr in dute la Diocesi. A la fin di cheste letare a vignaran alore dâts suggerimenti e indicadis iniziativis.

Il reclam a la Peraule dal Signôr in chescj agns al à créât interès, ma al à ancje saborât cualchi domande sedi in riferiment ai Grups da la Peraule, sedi in gjenerâl pal confront cu la Peraule dal Signôr ta la vite da lis comunitâts e dai singui. O pensi ch'al sedi util cjapâ in considerazion ju interrogatîfs che si ripetin plui voltis cirint di dâ cualchi rispueste buine di inviâ la riflession personal e comunitarie. Cheste curte letare pastorâl e podarà partant jessi utilizade come introduzion a la

Peraule dal Signôr pai Grups da la Peraule (che l'an pastorâl stât a àn vût une riprese e un impuls une vore prometents),  
pai diviers conseis e grups parochiâi e da lis agregazions laicâls,  
par la catechesi dai adults e par altris circostancis similis,  
in plui che par la leture e la meditazion personâls.

# CUALCHI DOMANDE

## **Parcè dâ impuartance a la Peraule dal Signôr?**

La domande juste di dulà scomençâ no je cheste. A 'nd è une prime e plui direte: parcè dâ impuartance al Signôr? Se il Signôr al è impuantant par noaltris, alore al è naturâl ch'e je impuantante la sô Peraule, ch'al è fondamentâl scoltâlu. La peraule, se no je cjacare vueide, e spiegle la persone, e comuniche il so pinsîr, e manifeste i siei sintiments, e palese chel ch'al è tal so cûr. Par chest tal rapuart personal, tal cognossisi, tal cressi di une sintonie e parfin di un afiet o di une amicizie, la peraule e je fondamentâl. Chest al vâl tra personis e ancjemò di plui tal nestri rapuart cul Signôr. Si scolte e si fevele però, in maniere atente e continuative no superficiâl e ocasionâl, dome cun cui che nus interesse. Il Signôr nus interessial? Volîno lâ daûr di un itinerari, par cierts aspiets magari fadiôs, che nus puarte a vierzisi cul Signôr e parie cun chei altris, cundizion indispensabile par scuvierzi un pôc a la volte la veretât di noaltris stes? Dome se la rispueste e je positive, alore nus pues e nus dêf interessâ scomençâ o continuâ un percors ardît cu la Peraule.

## **Dulà si cjatie la Peraule dal Signôr?**

## **Dulà il Signôr fevelial?**

Il Signôr nus fevele a noaltris in tantis manieris: ta la Sacre Scritture, midiant dal insegnament da la Glesie, a mieç da la creazion, dentri il gredei dai events da la storie, ta lis comunitâts, cu lis testemoneancis di santitât (ancje difûr dai con-

fins da la Glesie...), dentri il cûr da lis personis. Ducj cjamps dulà che il Signôr si palese, dulà ch'al va cirût, scoltât e acolt.

### **Parcè alore vê miôr la Bibie?**

Parcè che la Sacre Scriture e je il lûc privilegjât e sigûr dulà che il Signôr nus fevele e si palese. I libris biblics a son scrts par ispirazion dal Spirt Sant, nus fevelin dal Signôr, dal so agjî, da la sô opare di salvece tai nestris confronts e nus juidin a cognossi chel ch'al è tal cûr dal om. Nus palesin in particolâr Gjesù, so Fi ch'al è la Peraule vivent. Nus mostrin ancje cemût che une fulugne di personis, vie pai secui e i milenîs, a vedin cirût e ciatât un rapuart cul Signôr, scoltât e trasmetût la sô Peraule, orientant la lôr storie personâl e coletive ta l'olme da l'aleance cul Signôr. La Sacre Scriture e sugjerìs une maniere di concepî i rapuarts umans, di abitâ la storie, su la fonde di chel ch'al è il rapuart dal Signôr cu laumanitât. Nus conte storiis di oms e feminis, storiis normâls, cuałsisei: lis lôr vicendis a vegnin contadis sence platâ limits e difiets, par fânus constatâ che il Signôr lis abite e che la sô aleance e je a la puartade di ducj. Une leture aprofondide e ancje "profetiche" da la Peraule dal Signôr scrite no je mai però fin a se stesse, ma orientade a fâ intivâ chê Peraule di novitât che il Signôr al indrece ancje a noaltris ta la nestre storie a mieç di situazions, events e personis. Nus insegne a scoltâ il Signôr vuê, a ricognossi la sô Peraule ta lis diviersis realtâts socomençant dal nestri cûr. Sence l'alenament a la comprehension da la Peraule scrite, al è une vore dificil intivâ e capî la Peraule dal vuê.

## **La Bibie e je dificile, al covente jessi specialiscj par podèle lei e massime par capîle. Valial la pene di tentâ di istès di vierzile?**

Cualsisei test al domande un ciert impegn par jessi let e capit e la Sacre Scriture no fâs ecezion. Par esempi, par lei un articul di sport al è clâr ch'o dêf cognossi la lenghe doprade par scrivilu o ben leilu intune traduzion e po vê almancul une cognossince minime dai tiermins che si doprin in chê specifiche dissipline sportive, da lis regulis dal zûc, da lis espressions zergâls sportivis, e v.i. Par lei la Bibie, che no je stade scrite par talian e e je nassude in contescj culturâi in part une vore diviers dal nestri (almancul pal temp passât di alore), al covente vê a disposizion une buine traduzion, cognossi i elements fondamentâi dal idiome e da la culture biblics, vê cualchi idee di ce ch'al trate chel determinât libri che si cjape in esam, podê avalêsi di bogns coments.

### **In ogni câs al è alc di impegnatîf...**

Ciert, ma un cristian ch'al à fât ben a so temp il percors catechetic, ch'al va cun regolaritât ancje dome a Messe la domenie scoltant lis omeliis e lis diviersis spiegazions, al à di sigûr chê cognossince di base che i permet di svicinâsi a la Bibie. No si dêf dismenteâ che ogni trê agns – parcè che il cicli da lis trê leturis da la Messe da la domenie al è trienâl – si scoltin cuasi par intîr i cuatri Vanelis, diviersis leturis di san Pauli e pas signifikatîfs dai principâi libris dal Gnûf e dal Antîc Testament. L'an liturgjic 2019-2020 (cicli A) al proponarà la leture cuasi continuative dal Vanzeli di Mateu.

## **Ma di dulà scomençâ?**

Nol è conseât scomençâ ipso facto da lis primis pagjinis da la Bibie. Al è just, invezit, tacâ di un Vanzeli e po man man passâ ai altris Vanelis, ai Ats dai apuestui, a lis letaris di san Pauli e ai scrits dal Gnûf Testament, e tal ultin aventurâsi tai libris dal Antîc Testament, magari scomençant di un profete.

## **Isal miôr lei cualchi toc sielt o fâ une leture continue di un libri biblic, par esempli di un Vanzeli?**

Posto che ancje une sole frase da la Peraule dal Signôr, cu la gracie dal Spirt Sant, e pues colpî il cûr di une persone a tâl pont di cambiâi la vite (e i esemplis di conversions radicâls par cualchi peraule da la Bibie scoltade e rivade al cûr no mancjin, di sant Antoni abât e sant Agostin) e che, duncje, ancje dome lei e interiorizâ une frase ogni dì al è impuantant, al reste il fat che dome une leture integrâl e continue e pues vierzi a la comprehension di un Vanzeli o di un altri libri biblic. I Vanelis, in particolâr, no son une racuelte di massimis o di fats intassâts plui o mancul un dopo di chel altri, ma a son stâts pensâts come un libri unitari. Cussì al spieghe il stes evangjelist Luche tal proemi dal so Vanzeli, dulà ch'al aferme che tancj di lôr prime di lui a vevin cjapât sù la storie dai events e da lis peraulis di Gjesù dai testimonis direts che a jerin stâts i prins ministris da la Peraule, ma che lui stes al veve stimât necessari fâ une «*relazion ordenade*» dopo di vê «*fat ricercjis curadis su ogni circostance*». Duncje l'evangjelist nus dîs che il Vanzeli che vuê o leìn al è stât precedût da la predication dai apuestui e dai testimonis ch'a àn viodût cui

proprios voi e dai prins scrits ch'a contegnin cheste predication, e che i Vanelis che vuê o vin tra lis mans a son tescj unitaris e ben organizâts. Da rest, e chest al vâl par ogni libri da la Sacre Scripture, al è ancje vêr che la Bibie si dicern cu la Bibie: plui che si cognòs la Scripture, tai siei diviers libris e tal so insieme, tant plui facil al è discerni ancje il singul pas. Sence dismenteâ mai ch'al è il Resurît Cui che, come ai dissepui di Emaus (cf Lc 24,27), al spieghe il sens di dute la Scripture: Lui, la Peraule fate cjâr, a 'nd è di fat il compiment. Il Signôr, midiant di dutis lis peraulis da la Sacre Scripture, al dîs dome une Peraule, il so unic Verp, là ch'al dîs dut se stes (cf Ebreus 1,1-3).

### **E chest valial massime pai Vanelis?**

Sigûr, come ch'al spieghe Luche stes, destinant il so scrit a un ciert Teofil, forsi une persone concrete o, plui facil, un non (che il so significât al è "amât dal Signôr") ch'al indiche un letôr cristian. L'evangelist al aferme ch'al à scrit il Vanzeli par che il so letôr si «*rindi cont da la soliditât dai insegnaments vûts*». O podaressin dî che il Vanzeli di Luche al è scrit par cui ch'al è za cristian e al vûl cognossi miôr la sô fede, il so rapuart personâl cun Gjesù.

### **Duncje i Vanelis no sono stâts scrits cuntun fin storic?**

L'evangelist Luche al à realizât un lavôr ancje di storic, scoltant i testimonis e fasint ricercjis, e cussì ancje chei altris evangeliscj. Ma lôr no vevin chê di dânum une cronache precise di chel che Gjesù al à dit e fat, ma pitost di judânum a co-

gnossilu come il Signôr e Salvadôr. L'intindiment dai Vanzelis al è puartânu a la fede, nancje dîlu fasint stât sul dât storic dal Fi dal Signôr che si è fat om, al à vivût in Palestine, al à anunziât la salvece, al à fat miracui, al è muart e resurît, al à mandât i siei dissepui tal mont par anunziâ la buine gnove. Un altri evangjelist, Zuan, lu spieghe une vore ben a conclusion dal so Vanzeli: «*Gjesù, devant dai siei dissepui, al fasè tancj altris spiei che no son stâts scrìts in chest libri. Ma chei ca a son stâts scrìts par che o crodedis che Gjesù al è il Crist, il Fi dal Signôr, e par che, cul crodi, o vedis la vite tal so non*» (Zn 20, 30-31). A noaltris nus plasarès cognossi ancje chel che l'evangjelist nol à scrit, ma a lui i interesse che il Vanzeli nus puarti a la fede e a la vite.

### **Alore la storie no interessie leint i Vanzelis e la Bibie?**

La Bibie nus presente la storie da la salvece, chest al interesse. Ma la storie da la salvece no je fantasie, e je presince dal Signôr dentri da lis vicendis da la storie umane. La Bibie e à un grum di dâts storics e i studiôs a san confrontâju ancje cun diversis fonts scritis o di altri gjenar par ricostruî la storie dal popul di Israël, di Gjesù, da la prime Glesie. Un lavôr ch'al jude a dicerni miôr la Sacre Scriture stesse.

### **I studiôs da la Bibie sono duncje impuantants?**

In assolût e no dome par lis cuistions storichis. In gracie dal lavôr pazient e perseverant, massime tai ultins doi secui, di miârs di bibliscj, catolics e no, esperts cun variis competencis o podin vê a disposizion, par merit da la critiche testuâl, un

test il plui possibil dongje dal origjinâl dai libris biblics; o vin a disposizion otimis traduzions, basadis suntune cognossince miôr da lis lengthis origjinâls e da lis relativis culturis; o rivìn a cognossi il procès di formazion dai diviers libris biblics cul lôr gjenar leterari e a dicerni il sens di ogni pas in gracie da la esegjesi e in particolâr dal sisteme storic critic. Cul tramat di cualchi contat cu la analisi leterarie, retoriche, narrative, semiotiche, o vin ancje la possibilitât di cognossi miôr lis modalitâts espressivis di ogni test, intant che il contribût di diviersis siencis umanis (sociologje, antropologje culturâl, psicologje, psicoanalisi, e v.i.) nus permet di dicernint miôr contest, carateristichis, finalitâts, o di leilu di ponts di viste diferents (par es. une leture "feminîl"). Al esist ancje il svicinâsi "canonic" a la Sacre Scriture, che nol calcole inutii chei altris metodis, ma al partìs dal test cussì come nus ven consegnât da la Glesie viodintlu tal so complès e tal so messaç. Al è clâr che il letôr da la Bibie cuntune base culturâl suficient, sence però jessi un specialist, nol podarà che ricevi cun ricognossince dai studiôs i risultâts dal lôr lavôr – spes cumò disponibii ancje su internet – e se mai vê ancjemò plui voie di cognossi la Scriture e duncje la Peraule dal Signôr cuntun aprofondiment personal.

**Tantis personis ch'a àn scomençât a lei cun scrupul e in maniere analitiche ancje dome i Vanelis, a disin che chest al à mandât in crisi la lôr fede tradizionâl, chel ch'a vevin imparât a catechisim...**

Cun probabilitât si trate di personis no plui tant zovinis..., parcè che i catechisims proponûts dai vescui talians dai agns '70

incà dal secul stât a àn un fuart stamp biblic, a introdusin a la cognossince dal Gjesù dai Vanelis e a judin a fondâ la fede su la Peraule dal Signôr. Cui ch'al è stât invezit formât sul catechism di Piu X, fat a domandis e rispuestis, al pues provâ cualchi disasi. Si trate di un catechism nassût intun contest dulà che la teologje e il magjisteri a fasevin pursì riferiment a la Bibie, ma in maniere mediade, magari cirint in cheste cualchi pas, spes isolât al contest, a sosten da lis tesis dogmatichis. La prime domande e jere: *Cui nus aial créât?* E a pet da la rispueste: *Diu*, la seconde domande e jere: *Cui isal Diu?* cu la rispueste: *Diu al è il Jessi Perfetissim, Creadôr e Signôr dal cîl e da la tiere.* Dutis afermazions veris, ma il Diu dal Vanzeli al è prin di dut il Pari che nus vûl ben e ch'al à mandât so Fi no a judicâ, ma a salvâ il mont. Di un Diu Jessi Perfetissim a un Diu ch'al è Pari che nus vûl ben, ch'al è Fi fat om muart e resurît par noaltris, ch'al è Spirt Sant che nus incolme di gracie... la robe e cambie. E nus coinvolç e interoghe tant di plui. Al covente alore fâ un itinerari di conversion, cu la cognossince e l'acet da la Peraule dal Signôr, che nol rinee la fede vude e cemût che nus è stade trasmetude, ma le purifiche, le rint plui biele, plui liberatorie, ch'e sfrancje e e gratifiche il spirt, plui gaiose... Ma ancje plui impegnative. Parcè che il Signôr al è Pari misericordiôs che ti vûl ben, che no ti domande la osservance scrupulose di cualchi comandament, osservance ch'e sarà sometude a judizi sevêr de bande di un Diu judiç, ma une totâl rispueste di amôr: «*Tu amarâs il Signôr, to Diu, cun dut il to cûr, cun dute la tô anime, cun dute la tô fuerce e cun dute la tô ment, e il to prossim come te*

*stes»* (Lc 10,27). L'amôr al è esigent e insieme liberatori che al sfrancje e al gratifiche il spirt.

### **La Peraule dal Signôr duncje puedie judâ a dicerni miôr chel che nus è stât insegnât tal passât e ancje lis diviersis pratichis religjosis?**

Esat, cul puartânsu su la lidrîs ch'e je la Peraule rivelade. Par esempi, che si pensi a cemût ch'al pues cambiâ il nestri mût di confessâsi se chê ch'e vignive clamade la parabule dal fi pierdût e e jere lete dome te prime part, e ven viodude cumò in maniere corete come la parabule dal Pari misericordiôs che al domande une conversion al so amôr de bande dai doi fîs, chel ch'al è lât lontan e chel che nol capìs il don di jessi te cjase di un Pari ch'al à misericordie e nus fâs tornâ fradis. Ancje la maniere di concepî la morâl cristiane e pues cjatâ te Bibie une rinovade comprenzion. Par esempi i comandaments, lets tal lôr contest, si manifestin no tant che une sfilze astrate di normis, ma une propueste di vite de bande dal Signôr da la aleance, dal Signôr liberadôr. Fin il nestri mût di jessi comunità cristiane, se al torne a la esperience da la prime comunità descrite in particolâr tal libri dai Ats dai apuestui e ancje ta lis letaris apostolichis, al pues vê un rinovament radicâl.

### **E cemût la Peraule dal Signôr puedie judâ a rinovâ l'itinerari di fede personâl?**

Un jutori al pues vignî di une leture dai tescj da la Sacre Scripture ch'e meti in lûs l'itinerari di fede dai diviers personaç (che no son "personaç", ma personis reâls, autentichis...) e che nus puarti a ricognossisi in lôr. Jo o soi Abram: ancje a mi

il Signôr mi domande di lâ fûr di une “mê” tiere... Jo o soi Elie: ancje a mi il Signôr mi domande di tornâ su la sô mont sante... Jo o soi Lisabete: ancje jo o sperimenti spes la sterilitât, ma ancje la gracie sorprendent dal Signôr... Jo o soi Pieri: o voi daûr di Gjesù cun entusiasim, ma come lui o fâs fadie a acetâ la crôs... Jo o soi la Madalene: ancje jo o soi clamade par non e inviade a testemoneâ il Resurît... Un percors ch'al pues jessi sperimentât cuant che si è za rivâts a cognossi di plui la Bibie. Prime però al è impuantant fâsi dôs domandis semplicis, in particolâr leint i Vanelis: in chest toc cui isal Gjesù? e cui soio jo? Cognossi di plui il Signôr, cressi te cognossince di me stes, acetâmi par come ch'o soi amât dal Signôr e capî ch'o ai di someâi a Lui, domandant al Spirt Sant di vê un pôc a la volte i siei stes sintiments. Chest al è il parcè dal svicinâsi a la Peraule dal Signôr.

### **Cemût la Sacre Scriture puedie judâ l'itinerari comunitari?**

Lei, meditâ, preâ insieme la Peraule dal Signôr no je une cusion di comoditât o di compagnie, ma un cressi insieme te cognossince dal Signôr e dai altris e tal dicerni l'itinerari da la proprie comunitât. Madressint insieme peâts a la Peraule cul jutori dal Spirt Sant, si cjape un pôc a la volte (i vûl timp...) cussience che si è par bandonâ i criteris umans da la eficienze, dal protagonism, dal contrast, da la furbetât, dal interès, e v.i., par assumi i criteris dal Vanzeli. Ciert, simpri intune continue lote (lote spirituâl, personal, ma ancje comunitarie cuntun confront sincîr e parfin cu la corezion fraterne), parcè

che il confin tra forment e zizanie al passe dentri dal cûr di ognidun e dome il Spirt al sa dicernilu. Però si pues cressi, se si è disponibii a acetâ cun umiltât la Peraule ancje cuant che «*e je vive, fuarte e e taie plui di ogni spade a tai dopli*» e «*e va indentri fin al pont di division da l'anime e dal spirit, fin a lis comissuris e a lis medolis, e e dicern i sintiments e i pinsîrs dal cûr*» (Ebreus 4,12). I Grups da la Peraule alore no son une modalitât tra lis tantis dal svicinâsi a la Peraule, ma a puedin jessi un itinerari comun, progressîf, impegnatîf e a voltis fadiôs, ma plen da la gaudie dal Vanzeli e bon di trasformâ il cûr da lis personis e da lis comunitâts.

### **Ce fasial un Grup da la Peraule?**

Plui che cun peraulis o volarès spiegâlu cuntun esempli. O ringracii un Grup da la Peraule ch'al à acetât di registrâ un so incuintri. No ai trascrit dut, ancje par resons di spazi, ma dome i pas fondamentâi dal lôr confront. Al è clâr che i nons a son stâts cambiâts. Ur ai proponût il pas evangelic ch'al pues lâ ben par la *lectio*, consegnant la schede introdutive ch'o ripuarti subit ca sot, prontade di un amì biblist, che lu ringracii ancje lui. Il toc al è l'inizi dal cjap. 15 dal Vanzeli di Luche: la parabule da la piore pierdude (n.b.: come che si viodarà, il prin ch'al fevele, Ettore, al fâs di moderadôr dal grup).

## LA PIORE PIERDUDE

### Schede introdutive a Luche 15,1-7

La parabule da la piore pierdude si le cjate sedi tal Vanzeli di Luche, sedi ta chel di Mateu (18,11-14). Mateu le met dentri dal discors presentât tal cjap. 18, ch'al à come teme la comunitât cristiane e l'attenzion pai "piçui". Gjesù al conclût, di fat, la curte parabule afermant: «*Cussì e je volontât dal Pari vuestri ch'al è tai cîi, che nancje un di chescj piçui nol ledi pierdût*» (18,14).

Luche, invezit, al coleghes la parabule cun altri dôs, chê da la dracme pierdude e chê dal pari e dai doi fîs, e le incuadre intun precîs contest, descrit tai prins doi versets dal cjapitul: il fâsi dongje a Gjesù dai publicans e dai pecjadôrs e la mormorazion dai fariseus e dai do-tôrs da la leç. Un contest che no si coleghes dal pont di viste naratîf cun ce c'al ven prime o dopo: nol è duncje un episodi precîs, ma un esempi dal compuartament abituâl di Gjesù.

I publicans a son i esatôrs da lis tassis, assimilâts ai pagans e duncje impûrs, considerâts da la int laris e profitadôrs. I pecjadôrs a son chei che si compuartin in mût contrari a la Leç dal Signôr, a son i "delincuentes" (e i "stupits") che a fevelin i salms e i libris sapienziâi.

Dispès publicans e pecjadôrs a son presentâts insieme tai Vanelis (Mt 9,10-11; Mt 11,19; Mc 2,15-16; Lc 5,30; Lc 7,34). I van dongje a Gjesù par scoltâlu. Gjesù no ju cîr, ma intune cierte maniere ju atrai (ancje la pecjadore di Lc 7,36-50 e cîr Gjesù). Ancje se a son plui disponibii rispiet ai dotôrs da la leç e ai fariseus, ancje a lôr ur son diretis lis trê parabulis: a devin convertisi al amôr misericordiôs dal Pari, come il fi piçul da la tierce parabule (che cuant ch'al torne nol cîr un pari che i vueli ben tant che un fi, ma un paron di servî tant che un salariât).

I dotôrs da la leç a jerin laics esperts inte Leç, bogns di interpretâle cun carisme e di trascrivi i tescj biblics. I fariseus a jerin esponenti di une corint dal ebraism, une vore fedêl e rigorose ta l'interpretazion e ta l'aplicazion da la Leç. Ancje dotôrs da la leç e fariseus a costituissin spes une uniche categorie e a son presentâts insieme tai Vanelis (Mt 5,20; Mt 12,38; Mt 15,1; Mt 23,1; Mt 23,13-29; Mc 2,16; Mc 7,1-5; Lc 5,21; Lc 5,30; Lc 6,7; Lc 11,53; Zn 8,3). Il lôr trat al è chel di "mormorâ". Il verp al palese la rivendicazion di un dirit e al torne trê voltis tal Vanzeli di Luche: chês altris dôs a son cuant che Gjesù al aceté l'invît a simposi di Levi cui siei confradis publicans (5,30) e cuant ch'al va a cjase di Zacheu, sorestant dai publicans (11,3). Ma in

gjenerâl Gjesù al ven acusât di jessi «*un mangjon e une cjochele, ami dai publicans e dai pecjadôrs*» (Lc 7,34) e di mangjâ cun lôr trasgredint lis regulis (ancje Pieri al vignarà acusât in maniere simile par jessi jentrât in cjase dal centurion pagan Corneli e di vê mangjât cun lui: Ats 11,3). Il gustâ insieme al è segn di intimitât e il simposi inte Bibie al à ancje une conotazion escatologjiche: il grant simposi al temp da la fin (Isaie 25).

La parabule da la piore pierdude si ispire a une ativitât une vore difondude in Israël ai temps di Gjesù: l'arlevament di pioris e cjavris. Za l'Antîc Testament a 'ndi fasewe une leture simboliche, fidant al Signôr la funzion di pastôr (cf Gjeremie 23; Ezechiel 34 e salm 23/22), un pastôr ch'al à une cure individuâl da lis pioris tignint cont da la divierse situazion di ognidune. E al contrapon al mût di fâ dal Signôr chel dai pastôrs necuitôs, lis vuidis dal popul che invezit di guviernâlu pal ben lu sfrutin e lu dispierdin. Sul argoment al tornarà Zuan tal cjap. 10, cu la contraposizion tra il bon pastôr e il mercenari. Il teme da la piore pierdude al è presint ancje tal verset conclusif (176) dal salm 118/119: «*Tant che une piore fûr di trop o voi indevant a sorte; ven a cirâ il to famei parcè che no ai dismenteât i tiei comandaments*».

Come inte parabule da la monede ch'è ven dopo, il scheme doprât in chê da la piore al è: pierdite, ricerche, recuperar, fieste slargjade. L'interrogatîf retoric ch'al vierç la parabule, tipic di Luche (nol è tal pas pareli di Mateu), al è une maniere par coinvolzi di persone ju interlocutôrs, maniere ch'è je tal stîl di Gjesù sedi cuant ch'al conte une parabule scomençant cu la domande «*ce us parial?*» (Mt 21,28), sedi cuant che i ri-propon lis domandis che i vegnin fatis a cui che lu interoghe, par esempi su ce fâ par vê la vite eterne, sul plui grant comandament, sul tribût di dâ a Cesar. L'abandon da lis 99 tal desert par cirî la uniche pierdude al mostre une clare preference par cui ch'al è pierdût te sô unicitat (e je une progression tal rapuart tra "pierdûts" e no ta lis dôs parabulis ch'a vegnin dopo: ca 1 su 100; tal câs da la monede, 1 su 10; ta l'ultime parabule: 1 fi su 2). La ricerche e je ustinade e perseverant: «*fin che no le cjate*». La fieste cun amîs e convicins e somee sproporzionade a pet dal probleme risolt. La contentece par vê ciatât la piore si slargje: dal pastôr, ai amîs e i convicins, al cîl (ta la seconde parabule si fevele di gaudie devant dai agnui dal Signôr). Il cîl al indiche il Signôr. La gaudie dal Signôr par la conversion di un sôl pecjadôr e contraste cun ce ch'al è afermât tai tescj dai rabins: il Signôr al palese gaudie

par la resurezion dai juscj e par la ruvine dai delinquenti.

E je duncje une justificazion “teologjiche” dal comportament di Gjesù: al è daûr a vivi il stes mût di fâ dal Signôr. Si fevele di “conversion” dal pecjadôr e no dome di vêlu ciatât: un spazi par une sô libertât? In ogni câs il protagonist in cheste parabule e in chês dôs ch'a vegnin dopo al è il Signôr sot l'aspiet di pastôr, femine, pari. Pôc o nuie si dîs dal pecjadôr e da la sô conversion. La conversion e ven viodude dal pont di viste dal Signôr e no da la bande dal pecjadôr. La conversion e je apont assumi il pont di viste dal Signôr.

**Ettore:** O vin invocât il Spirt Sant cuntun cjant e cumò o podìn lei il toc di cheste sere. Si trate dai prins siet versets dal cjakitul 15 dal Vanzeli di Luche. Puedistu leilu tu, Petra?

**Petra:** Va ben.

### Dal Vanzeli di Luche

#### (cjap. 15)

<sup>1</sup>Si svicinavin a lui ducj i publicans e i pecjadôrs par scoltâlu. <sup>2</sup>I fariseus e i dotôrs da la leç a mormoravin disint: «Chel ca al acetè i pecjadôrs e al mangje cun lôr». <sup>3</sup>Alore Lui ur contà cheste parabule:

<sup>4</sup>«Cui di voaltris, se al à cent pioris e a 'nt piert une, no lassial lis novantenûf tal desert par lâ a cirî chê che si è pierdude fin che no le cjate? <sup>5</sup>Cuant che le à cjatade, se met su lis spalis dut content, <sup>6</sup>al torne a cjase, al clame i amîs e i convicins e ur dîs: "Fasêt fieste cun me, parcè ch'o ai cjatade la mê piore, chê che si jere pierdude". <sup>7</sup>Jo us dîs: cussì e sarà gaudie in cîl par un sôl pecjadôr che si convertìs plui che no par novantenûf juscj che no àn dibisugne di conversion».

**Ettore:** O soi sigûr che ducj o vedis za let, in plui dal toc dal Vanzeli, ancje la schede introductive e ch'o vedis za vût la pussibilitât di pensâi. No le tornìn a lei: sêso dacuardi?

**Ducj:** Dacuardi.

**Ettore:** Scomencìn, alore, come che nus àn insegnât, a capî ben chest pas dal Vanzeli, cul viodi cui ch'a son i sogjets. Po o

viodarìn lis lôr azions.

**Maura:** Al è facil: i publicans, i pecjadôrs, i fariseus e i dotôrs da la leç e, nancje dîlu, Gjesù...

**Doriana:** Tu âs dismenteât la piore pierdude e lis 99 pioris...

**Giovanna:** Ch'a corispuindin al pecjadôr e ai novantenûf juscj...

**Matej:** E a son ancje i amîs e i convicins...

**Ettore:** E ce fasino ducj chescj?

**Gregorio:** I publicans e i pecjadôrs si svicinin a Gjesù par scoltâlu...

**Ettore:** Duncje nol è Gjesù che ju cîr, ma a son lôr che lu cirin...

**Gregorio:** In efiet al è cussì. Al è diferent par la piore: si dîs ch'e je pierdude, che no va a cirî il pastôr o la strade par tornâ tal tamar...

**Maura:** No si dîs nancje che si è pierdude, ma che il pastôr le à pierdude...

**Gregorio:** Sêstu sigure che le à pierdude lui o che no sedi stade jê a pierdisi?

**Ettore:** In ogni câs al è ancje il pastôr tra i sogjets...

**Petra:** Ma nol è nomenât...

**Ettore:** In efiet no si fevele dal pastôr ma di un gjeneric "cui di voaltris". Ma tornìn a lis azions dai diviers personaçs.

**Gregorio:** I fariseus e i dotôrs da la leç a mormorin... A mor-

morin, duncje no critichin Gjesù a la lûs dal soreli, ma i fevelin par daûr. Però a fasin in mût che la critiche i rivi...

**Silvia:** I somee a chel ch'al sucêt a voltis tra di noaltris...

**Doriana:** Mi impressione chel ch'al fâs Gjesù: no si contrapon, ma al conte une parabule.

**Ettore:** E dopo al zonte altris dôs, ch'o viodarìn tai incuintris seguitîfs: chê da la dracme pierdude e chê che une volte si clamave dal "fi prodic".

**Doriana:** Di cuant ch'o ai scomençât a lei dabon il Vanzeli, o dêf dî che lis pagjinis che mi atrain di plui a son chês da lis parabulis... Tu ti sintis interrogade, coinvolte... in cualchi maniere no ti lassin in pâs.

**Ettore:** E ancje chê di vuê e sabore domandis...

**Petra:** Ma tornìn a Gjesù e a chel ch'al fâs. Chei ch'a mormorin cuntri di Lui a disin ch'al acetè i pecjadôrs e al mangje cun lôr.

**Gregorio:** Se no ricuardi mâl, cuant ch'al invide Mateu, il pubblican, a lâi daûr, la prime robe che Gjesù al fâs al è gustâ cun lui e cui siei confradis.

**Petra:** Za, Gjesù no i cride a Mateu, ma se no fali nancje a Zacheu... Al fâs fieste propit come il pastôr da la parabule. No i cride a la piore, ma al fâs fieste cui convicins e i amîs.

**Gregorio:** E la fieste e je ancje in cîl. E se il cîl, come che nus dîs la schede esegjetiche, al è segn dal Signôr, al vûl dî che il Signôr al fâs fieste.

**Matej:** Par la precision si dîs che la fieste in cîl e je, ma par un pecjadôr che si convertîs. Duncje e à di jessi une conversion ... o no?

**Giovanna:** Ma la piore no si convertîs, si lasse dome meti sulis spalis dal pastôr. Ise forsi chê la conversion che nus ven domandade? Lassâsi perdonâ...

**Matej:** O sai che tu Giovanna tu sêts daûr a pensâ che jo mi consideri un dai novantenûf juscj. Trancuile: ancje jo o soi un pecjadôr. Ma une misericordie un pôc masse a bon marcjât no mi convinç...

**Giovanna:** O viôt che pape Francesc no ti convinç masse culo ricuardâ sence polse la misericordie dal Signôr...

**Ettore:** No stait a barufâ, mi racomandi... Scusait se o interven tant che moderadôr, ma o pensi ch'al sedi impuantant che o concludin la part di *lectio*, la comprehension dal test. Isal ancjemò cualchi verp di meti in evidence?

**Gregorio:** Chel ch'al fâs il pastôr: lassâ lis novantenûf pioris tal desert, lâ a cirî chê pierdude, cjatâle, metile su lis sôs spalis, lâ a cjase, clamâ i amîs e i convicins, invidâju a fâ fieste cun lui...

**Silvia:** O ai contât siet azions... no pocjis. Mi visi di vê sintût une volte intune predicje che i Vanelis a àn pôcs agjetîfs, ma tancj verps. A son alc ch'al fâs cjaminâ...

**Doriania:** E che no ti lasse trancuile. O jeri daûr a pensâ a ce che tu disevis prime, Ettore, che la parabule no fevele dal pastôr, ma dal "cui di voaltris". Tu âs dit, se no ricuardi mât,

ch'al è un alc di gjeneric. No soi dacuardi: chel "cui" o soi jo, al è ognidun di noaltris... Ancje la schede esegjetiche nus à ricuardât che Gjesù al cîr simpri di coinvolzi il scoltadôr, massime contant lis parabulis. No dome chel di in chê volte, ma ancje chel di vuê. E o pensi che il scoltadôr al devi dopo decidisi e no dome scoltâ.

**Silvia:** Tu âs reson. E duncje mi domandi: ce fasarella jo? Jo di pioris no mi intint: o ai viodût dome cualchi trop sù tai pascui da la Cjargne. O pensi però che no lassarès lis novantenûf pioris tal desert par lâ a cirî une che si è pierdude. Tal desert, po. O cirarès almancul di metilis al sigûr tal tamar... Mi somee une robe cussì pôc realistiche il mût di fâ di chel pastôr. Mi ven di dî: piês par jê che si è pierdude. Magari par lâ daûr ai siei pinsîrs, ai siei siums o ancje dome par jessi diferente di chei altris... In sumis no metarès in pericul chês altris 99 par la matetât di une.

**Doriana:** O jeri daûr a pensâ a gno fi. O savêts, al è lât vie di cjase agns indaûr, no sai plui nuie di lui. Al jere finît dentri di un zîr strani. Mês dôs fiis, ch'a son invezit tesaurs, ch'a son sposadis e di ca un pôc une di lôr mi rindarà none, mi disin di lassâ pierdi, che Enrico al jere un esaltât, che jo e gno om o vin fat il pussibil... Ma jo o larès a cirîlu... O pensi ch'o fasarets fieste se lu ciatâs. Scusat, ma mi comôf...

**Ettore:** No stâ a preocupâti, Doriana. Ducj o vin i nestris problemis. No esistin fameis perfetis e nancje fîs perfets... O pensi, però, che il Signôr lu cîr il to Enrico...

**Silvia:** Mi torne iniment une altre parabule: chê dal bon pastôr. Ancje chê a pensâi ben e je strane. Che un pastôr al di findi lis sôs pioris dal lôf al è normâl, ma che, se metût davant di une sielte tra sacrificâ lis pioris o se stes, al sielç di murî al lôr puest e je une robe dal dut utopistiche. Un pastôr cussì nol esist...

**Gregorio:** Tu âs reson, Silvia. Tu intindis dînus che lis parabulis no son chêts contutis simpatichis e a voltis semplicis, come che di cuant in cuant a somein... Al è vêr chel ch'e diseve Doriana. No ti lassin in pâs. Ti fasin vignî sù tantis domandis.

**Matej:** O amet che di cuant ch'o partecipi al grup da la Perraule a son plui lis domandis che mi fâs, che no lis rispuestis ch'o rivi a dâmi. Cuant ch'o ai scomençât a vignî su invît di Ettore, o pensavi che i problemis a fossin capî ben i pas da la Bibie. Mi sintivi tant impreparât e spaurât. Il fat ch'o vin scomençât dal Vanzeli e no da lis primis pagjinis da la Bibie, di Adam e Eve tant par intindisi, mi veve cuietât. Ma un pôc a la volte o ai capît che la cuistion a jerin lis domandis che il Vanzeli mi rivolç. Sì, mi à metût in dificoltât. O ai 70 agns e il Vanzeli mi somee cussì diferent dal catechism che mi àn insegnât une volte... O amet: o soi in dificoltât... Però, o dêf zontâ cun scletece, il Gjesù dai Vanzelis mi atrai.

**Ettore:** Jo o ai dome cualchi an mancul di te, Matej, e ti capìs. Nol jere sbaliât il catechism di in chê volte, come che no jerin sbaliadis lis preieris che mi insegnave none Pine cuant che mi puartave in glesie e mi diseve di mandâi une bussadute a Gjesù... Ma frontâ diret il Vanzeli, aprofondîlu in chestis

seris insieme a voaltris, mi spalanche un mont gnûf. Ancje a mi mi fâs vignî tal cjâf tantis domandis. E no dome personâls. Par esempi, mi domandi cemût che si ponìn come comunità di cheste parochie tai confronts di chest Vanzeli. Mi plasarès proponilu come toc per la prime *lectio* dal consei pastorâl cu ven.

**Petra:** Buine idee. E sicut segretarie dal consei pastorâl jal proponarai al plevan. Ciert che dal moment che ancje tal consei pastorâl o vin decidût di scomençâ ogni incuintri cu la lecture di un pas dal Vanzeli e cuntune curte *lectio*, tantis robis a son daûr a cambiâ. Di prin intro o jerin ducj un pôc sudizionôs e al jere za tant se ognidun, o quasi, al ripeteve a vòs alte une frase che lu veve colpît. Po o vin imparât a dî alc di plui, cul rispuindi a lis dôs domandis che il vescul nus veve suggerît za temp indaûr: su la fonde dal pas di Vanzeli, cui isal Gjesù? Cui soio jo?

**Maura:** Tu âs reson, Petra. Ancje jo o soi dal consei. Di quant ch'ò fasìn cussì lis riunions a van une vore miôr, si cognossin di plui parcè che ognidun in cualchi maniere al dîs alc di se in relazion al vanzeli e o sin daûr a imparâ a lei l'itinerari da la nestre unitât pastorâl su la fonde dai criteris di Gjesù.

**Ettore:** Scusait se sicut moderadôr ogni tant o torni a puartâ il nestri confront al toc di cheste sere. O cjapi ispirazion di chel ch'è à dit Petra. Puedio domandâus di provâ a rispuindi, cun pocjis peraulis mi racomandi, a lis dôs domandis: cui isal Gjesù in chest toc e cui sino noaltris?

**Gregorio:** Gjesù al è un ch'al fâs fieste pai pecjadôrs e cui

pecjadôrs. E jo? Jo o soi un pecjadôr e o soi content di jessi, cussì i doi l'ocasion di fâ fieste cul perdonâmi e cjapâmi su lis spalis...

**Matej:** Se tu ti convertissis...

**Silvia:** Gjesù al è un che nus cîr e cun grant afiet nus met su lis spalis, al sigûr. Jo? Jo o sai di jessi pecjadore, ma tantis voltis mi sint juste e, par altri, part no dai 99 juscj, parcè che spes o pensi ch'a sedin 99 i pecjadôrs e che jo o sedi la sole juste...

**Petra:** Gjesù al è un ch'al fâs fieste pai pecjadôrs. Nol è un judiz pront a cjastiânus. E la Madone no à di tratignîi il braç cjastiadôr... Cui soio jo? O, miôr, cui volaressio jessi? Une persone che si sint amade, perdonade, ch'e je buine di perdonâ e ancje, e e je forsi la robe plui dificil, di perdonâsi.

**Giovanna:** O soi dacuardi cun te, Petra. Lu ai dit ancje prime: la conversion e je lassâsi perdonâ, lassâsi volê ben. Mi plasarès sperimentâlu di plui. A scomençâ dal sacrament da la confession. Al è cussì dificil. Ma mi plasarès in chel sacrament cirî Gjesù come ch'a fasevin i publicans e i pecjadôrs dal Vanzeli. E cyatâ il perdon dal Pari e une vite gnove vuidade dal Spirt Sant.

**Maura:** Il Spirt Sant. Spes si dismenteìn di Lui. Ma al è il Spirt che nus jude a capî la Peraule dal Signôr e a metile in pratiche. Di bessôi no rivìn. O dovìn invocâlu par ch'al fasi jentrâ tal cûr e te vite chel che il Vanzeli nus insegne.

**Doriania:** Che il Spirt Sant mi judi a capî ce ch'o pues fâ par

gno fi. Forsi dome vaî e preâ.

**Ettore:** A proposit di preiere, cuale preiere us vegnie iniment partint da la nestre parabule?

**Maura:** Chel salm une vore biel ch'al fevele dal pastôr che nus puarte tai pascui plens di jerbe. Tu Ettore, che tu cognos sis miôr di noaltris la Bibie, tu podaressis cirîlu...

**Petra:** Ma chel salm al ven ancje cjantât. Mi plâs la version che se no fali e je di p. Turoldo: Il Signôr al è il gno pastôr, no mi mancje nuie, su prâts di jerbe frescje mi fâs polysâ...

**Ettore:** Concludìn alore cul cjantâlu. Intonilu tu, Petra che lu sâs ben.

Il Signôr al è il gno pastôr, no mi mancje nuie. Su prâts di jerbe frescje mi fâs polysâ, mi mene dilunc aghis cuietis.

Al ricree l'anime mê, par trois di justizie mi vuide par amôr dal so Non, cun Lui mi sint sigûr.

Ancje se o las par gole scure, no varai pôre di nissun mâl, parcè che tu sêš simpri cun me, il to baston mi pare.

Ce taule che Tu prontis par me sot dai voi dai miei nemîs! Di vueli tu mi onzis il cjâf e la mê tace e je colme di entusiasim.

Bontât e gracie mi accompagnaran ducj i dîs da la mê vite: Jo o starai te cjase dal Signôr vie par dut il migrâ dai dîs.

## **SUGJERIMENTS E INIZIATIVIS**

A conclusion di cheste letare ve un pôcs di sugjерiments e l'indicazion di cualchi iniziative par cressi te cognossince da la Peraule dal Signôr, par che cheste e sedi simpri plui tal mieç da la vite di ogni cristian e di ogni comunità.

### **I Grups da la Peraule**

I Grups da la Peraule a son la sielte primarie da la nestre diocesi par chest an pastorâl. Dopo da la fase sperimentâl dal an passât ch'è à fat riferiment ai pas dal Vanzeli relatîfs al Resurît e al so mandât, chest an si larà daûr dal Vanzeli di Mateu, ch'al è chel proponût dal an A dal cicli dal lezionari di fieste.

Come ogni sielte e je discutibile, ma o domandarès a ducj i Grups da la diocesi di lâ daûr di cheste indicazion e dal implant proponût. Lu domandarès ai Grups da lis parochiis e da lis unitâts pastorâls, ma ancje a chei da lis associazions e moviments. Preâ ducj la stesse Peraule al pues fâ cressi une vore la nestre Glesie, nus fâs sperimentâ un sens di aparti-gnince plui fuart, nus fâs sintî part di un itinerari comun. O sai che chest i pues creâ cualchi dificoltât ai Grups abituâts a incuintrâsi su la Peraule dal Signôr da la domenie, in particolâr sul toc dal Vanzeli, ma apont il Vanzeli sielt al è chel che si scoltarà te liturgjie da la domenie. Si varà po particolâr aten-zion a presentâ dentri da la leture integrâl di Mateu, i tocs ch'a vegnin lets vie par lis Messis da la domenie e si si acuar-zarà in curt cetante ricjece ch'al à il considerâ ogni singul toc – clâr che te celebrazion liturgjiche nol pues superâ une cier-

te lungjece – tal so contest e dentri dal itinerari svilupât dal evangjelist. Ancje i Grups che si cjatin di temp e a àn cuistât une cierte esperience e capacitât di leture, a podaressin sintîsi in cualchi maniere un pôc costrets di une sielte ritignude inferiôr a lis lôr abilitâts: ma un fregul di umiltât e ancje une disponibilitât a tornâ a scomençâ cuntun sisteme ch'a coinvolzi di plui lis personis, no fasin sigûr mât... (come ancje – al è un suggeriment – dividisi e favorî cussì la nassite di altris Grups, dulà coinvolzi gnovis personis).

Une volte al mês al vignarà fat un incuintri diocesan e a chest a son clamâts a partecipâ ducj i animadôrs dai Grups, ma viert ancje a ducj chei ch'a varessin gust di jessi presints, là ch'e vignarà presentade une schede esegjetiche di caratar introdutif lant daûr dal Vanzeli di Mateu. La schede no à chê di esaurî il lavôr di ogni Grup, ma di inviâlu partint di une semplice e salde base esegjetiche (par no colâ in moralisims, sentimentalism, deviazions,...).

L'incuintri dal Grup, di fâlu almancul ogni cuindis dîs, al va preparât personalmentri di ognidun e al va vuidât dal modradôr o di cualchi incaricât. Al pues davuelzisi, se no son dificoltâts, intune cjase, ospit di une famee, o ancje tai locâi da la parochie e da lis associazions. Al jude tant scomençâ l'incuintri intun clime di cidinôr, cun tal mieç une icone, une lum, il libri da la Bibie, e cun l'invocazion dal Spirt.

La schede in ogni câs no sostituìs l'incuintri, ma lu prepare: cheste si propon di facilitâ la prime part (o sei la *lectio*), in maniere di frontâ ben il confront cul contribût di ognidun su la Peraule (la *meditatio*) e di rivâ po a la preiere (l'*oratio*) e

ancje al dicerniment su la vite concrete da la proprie comunitât ancje in viste di cualchi possibile sielte (la *actio*). Tai incuintrys diocesans seguitâfs i animadôrs a puedin puartâ domandis, dubis, dificoltâts, suggeriments dal propri Grup.

A puedin jessi, par buinis resons, differentis modalitâts par scompartî i diviers moments. L'esempli ripuartât ta lis pagjini prime al presente un Grup ch'al à miôr il moment da la *lectio* e lu fronte insieme in forme dialogiche cul lassâsi vuidâ, tal dicerniment dal toc, di cualchi domande progressive: cui sono i sogjets?, cuâi sono i verps (o sei lis azions dai sogjets)? cui isal Gjesù? cui soio jo (o cui sino nô)? Al ven dopo cualchi esempli concret su la vite di cualchidun dai presints e da la comunitàt là ch'a son inserîts e une preiere.

Si pues invezit dâ plui spazi a la *meditatio*, calcolât come sigûr il moment da la *lectio* fate personalmentri. Si scomence subit dal scambi di bande di ognidun, tacant da la meditazion che ognun al varà fat prime su la fonde da la schede esegjetiche (se dal câs si pues tornâ a lei insieme cualchi pas). Ju intervents a devin davuelzisi sence interferencis di nissun, par che la riflession personâl no deventi ogjet di preseaments o di critichis di altris, ma ch'e vegni acolte cun disponibilitât di ognidun dai presints. Al pues vignî dopo un secont moment di scambi dulà podê palesâ dubis o fâ domandis che l'animadôr e ducj chei ch'a fasin part dal Grup a podin tentâ di rispuindi o che si intint domandâ un sclariment tal incuintri diocesan dopo. Infin si pues cirî di inviâ un dicerniment comun scomençant da la Peraule scoltade e meditade in riferiment a la rellatâ che si è daûr a vivi a livel di grup, di co-

munitât plui ample (parochiâl, di unitât pastorâl, e v.i.), di Glesie e di societât.

Une altre modalitât di incuintri dal Grup e pues invezit preferî soreduç chest ultin passaç, chel dal dicerniment in viste ancje di une *actio*.

Ogni Grup al dêf cjatâ il so model e ancje fâlu evolvi su la fonde da la progressive maturazion tal scoltâ la Peraule. In ogni câs, par sghindâ derivis sentimentâls, emozionâls, leadis al mût individuâl e afetîf di vivi la fede cristiane cul nudrîle di "devozions" e preieris, no di necessitât patrimoni da la liturgjie, o ancje di lâ subit sul pratic e su formis di eficientisim, al covente dâ simpri spazi ampli a la scolte e a la comprehension dal toc biblic cuntun respîr sincîr a l'azion dal Spirt Sant di invocâ cun fiducie.

### **La Peraule da la liturgjie di domenie**

La riforme liturgjiche nus proferîs di decenis la Peraule dal Signôr cun bondance. Cemût acolzile ricognossintle un tesaur preziôs? Come che si diseve, i Grups da la Peraule a puedin vê miôr dentri dal Vanzeli di Mateu i pas che si lein di domenie. Al è purpûr sperabil che in ogni parochie o unitât pastorâl al sedi un piçul grup di letôrs che si preparedin par temp, magari cuntun sacerdot, su la liturgjie da la domenie dopo. In ogni câs la Peraule dal Signôr e va proclamade ben ta la liturgjie, no di letôrs improvisâts, no di fruts, ma di personis prep-paradis.

La omelie e dêf jessi pertinent a la Peraule e preparade tignint cont dai suggerimenti savis e concrets di pape Francesc

(cf *Evangelii gaudium*, 135-144).

Al è util sugjerî ai fedêi di puartâsi cjase i sfueuts cu la liturgjie da la domenie (a devin jessi duncje a disposizion cun bondance in ogni Messe di fieste). Ognidun al podarà cussì vie par la setemane tornâ a lei il Vanzeli o une leture, marcâ un verset, ripiâ une invocazion.

Ancje i sfueis parochiâi o da la unitât pastorâl a dovaressin vê simpri cualchi coment su la Peraule dal Signôr da la domenie. A chest proposit si podarès cjapâ ancje suggeriment dal video “Vivere la Parola” presint ogni domenie sul sít e sui *social* da la diocesi (in plui dai sacerdots, a vignaran clamâts a preparâlu ancje diacuns, religjôs e religjosis, laics e laichis).

### **La Peraule da la liturgjie di dîs di vore**

Pûr di mancul dal sigûr rispiet a lis domeniis, a son ancjemò tantis personis ch'a van a Messe ogni dì. Ancje in chest câs la proclamation da la Peraule dal Signôr e va curade ben e mai improvisade. Par favorî la *lectio* continue al è miôr il lezionari di dîs di vore, cuant che nol sedi obligatori chel dai sants.

O domandarès che in ogni Messe di dîs di vore a sedin doi minûts (no di plui...) ch'a introdusedin te Peraule o prime da la leture o come omelie curte curte, metint in lûs un teme, un passaç, magari disint dôs peraulis di introduzion o incuadrament co si scomence la leture di un gnûf libri, invidant cui ch'al pues a tornâ a leile a cjase sô magari cul jutori di un coment.

Co no son prescrits formularis specifics pai tescj da la Me-

sse al pues po judâ une vore sielzi, tra lis tantis pussibilitâts ufiertis dal Messâl roman, un formulari che si coordeni cu la Peraule dal dì e cul moment che la comunità e je daûr a vivi.

### **La Peraule ta la vite di ogni dì**

Cui che nol pues partecipâ a la liturgjie di dîs di vore al pues simpri lei ogni dì par so cont lis leturis cuotidianis (cul cjapâlis par esempli dal sít da la CEI [www.chiesacattolica.it](http://www.chiesacattolica.it)).

Un altri jutori al pues vignî dal calendariut a tirade prontât a pueste par la nestre diocesi che si inviarà cu la prime domenie di advent. Lei une frase, tignîle tal cûr, fâle deventâ preiere vie pal dì e pues jessi motîf di grande consolazion e di stimul par une vite cristiane.

Lis associazions, i moviments, i Grups da la Peraule stes a puedin po proponi ogni dì ai siei membris un pas da la Peraule dal Signôr (miôr se chê dal dì), doprant i *social network* e impegnant a turni lis diviersis personis.

Ancje lis catechistis e i catechiscj a puedin ciatâ formis semplicis, interessantis e apassionantis par judâ i fruts, fantats, zovins a jentrâ un pôc a la volte te cognossince da la Peraule dal Signôr, dal Vanzeli, di Gjesù.

## **UN LIBRI DISTRUT, UN LIBRI MANGJÂT, UN LIBRI DISVELÂT**

O vin scomençât il nestri percors cuntun libri cjacât tal templi. Inte Bibie altris voltis si fevele dal libri da la Peraule. O ricuardi trê pas: un libri distrut in maniere sistematiche, un libri/rodul mangjât, un libri disvelât.

### **Un libri distrut: la Peraule refudade**

Tal cjakital 36 dal libri dal profete Gjeremie al è un episodi preoccupant. Al re Joiakim, fi dal re Gjosie (chel dal libri cjacât), dal pont di viste religjôs l'esat contrari dal pari, i ven puartât il libri (in forme di rodul) scrit di Baruc daûr detature ch'al conten lis profeziis di Gjeremie. Ve ce ch'al fâs il re:

*«Alore il re al mandà Judì a cjoli il rodul. Judì lu cjolè da la cjamare di Elisamà, il dotôr da la leç, e lu leiè devant dal re e di ducj i sorestants ch'a jerin atôr dal re. Il re al jere a stâ tal palaç d'invier - tal nono mês - e une fughere e ardeve devant di lui. Cumò, a pene che Judì al veve let trê o cuatri colonis, il re lis sbregave cul curtissut dal dotôr da la leç e lis butave tal fûc su la fughere, fin che dut il rodul nol fo consumât tal fûc da la fughere. Il re e ducj i siei ministris no tremarin e nancje no si sbregarin i vistîts tal sintî dutis chês peraulis. E pûr El-natàn, Delaià e Ghemarià a vevin suplicât il re di no brusâ il rodul, ma lui no ju scoltà. Anzit, al ordenà a Jeracmeèl, un fi dal re, a Seraià, fi di Azrièl, e a Selemie, fi di Abdeeèl, di ares-tâ il dotôr da la leç Baruc e il profete Gjeremie, ma il Signôr ju veve scuindûts» (Gjeremie 36, 21-26).*

Al impressione il fat che il re cun calme assolude si fasi lei dut il rodul e lu distruzi toc par toc. La Peraule e pues jessi scoltade e refudade in maniere cussiente e cui che le proclame fat tasê.

### **Un libri mangjât**

Ma al è ancje cui ch'al acolç la Peraule e si nudrìs di cheste. Al è il câs dal profete Ezechiel. Ve ce ch'al capite tal moment da la sô vocazion di bande dal Signôr: «"*Fi dal om, scolte ce che ti dîs e no sta jessi ribel come cheste gjenie di ribei: vierç la bocje e mangje ce che jo ti doi*". Jo o cjalai, e ve, une man slungjade viers di me e tignive un rodul. Lu displeà devant di me; al jere scrit sul dret e sul ledrôs e e veve dentri laments, zemudis e vuais. Mi disè: "Fi dal om, mangje ce che tu âs devant, mangje chest rodul, po va e fevelii a la cjase di Israël". Jo o vierzei la bocje e lui mi fasè mangjâ chel rodul e mi disè: "Fi dal om, pas la tô panze e jemple lis tôs vissaris cun chest rodul che jo ti doi". Jo lu mangjai: al fo par la mêm bocje dolç come la mîl. Po lui mi disè: "Fi dal om, dai, va a la cjase di Israël e feveliur cu la mêm peraule, [...]" . Mi disè ancjemò: "Fi dal om, dutis lis peraulis che ti dîs scoltilis cu la atenzion massime e tegnilis tal to cûr: po va, va cai depuwartâts, cai fîs dal to popul e feveliur. Che a scoltedin o che no scoltedin, tu disarâs: "Cussì al dîs il Signôr"» (Ezechiel 2.8-3,1-4.10-11).

Il profete al è clamât a nudrissi da la Peraule dal Signôr, a scoltâle e a tignîle tal cûr e cussì le pues proclaimâ. Une peraule dolce come la mîl ancje se e conten «laments, zemudis

e vuais», il lament dal Signôr pal so popul in esili. Ma la Pe-raule e je ancje simpri consolazion. Prin di dut par cui che le anunzie dopo vêle acolte e cui che le scolte cun dut il cûr.

### **Un libri disvelât**

Tal ultin libri da la Bibie, l'Apocalìs, al è un episodi pareli a chel da la vocazion di Ezechiel, dulà che il profete al è clamât a mangjâ il libri (cjap. 10). Ma si fevele ancje di un altri libri, un libri misteriôs sigjilât cun siet sigjîi:

*«E o viodei inte man drete di Cui ch'al stave sentât su la sente un libri a forme di rodul, scrit sul dret e sul ledrôs, sigjilât cun siet sigjîi. O viodei un agnul fuart ch'al proclaimave a plene vôs: "Cui isal degn di vierzi il libri e di tirâ vie i sigjîi?". Ma nissun, ni in cîl, ni in tiere, ni sot tiere, nol jere in stât di vierzi il libri e di dâi une cjalade. Jo o vaivi di dûr vaî parcè che nol fo cjatât nissun ch'al ves mertât di vierzi il libri e di dâi une cjalade. Un dai anzians mi disè: "No stâ a vaî; al à vinçût il leon da la tribù di Gjude, il sfiol di David, e al vierzarà il libri e i siei siet sigjîi". Po dopo o viodei tal mieç da la sente, cun intor lis cuatri creaturis viventis e i anzians, un Agnel, in pîts, ch'al someave jessi stât imolât; al veve siet cuars e siet voi, ch'a son i siet spirits dal Signôr mandâts su dute la tiere. L'Agnel al rivà e al cjomè il libri da la man drete di Cui ch'al stave sentât su la sente. E a pene che lu ve cjolt, lis cuatri creaturis viventis e i vincjecuatri anzians si butarin in zenoglon devant dal Agnel, ognidun cuntune cetre e copis di aur plenis di bonodôr, ch'a son lis preieris dai sants, e a cjantavin un cjant gnûf: "Tu tu sês degn di cjapâ in man il li-*

*bri e di vierzi i siei sigjîi, parcè che tu sêts stât imolât e tu âs riscatât pal Signôr, cul to sanc, oms di ogni tribù, lenghe, popul e nazion, e tu âs fat di lôr, pal nestri Signôr, un ream e sacerdots, e a regnaran su la tiere”» (Apocalîs 5,1-10).*

L’Agnel dal Signôr, Chel ch’al à dât la vite par noaltris al è Chel ch’al è il sens profont di ogni Scriture. Lui al è la Peraule vivent, il Verp che si è fat cjar. Ogni pas da la Sacre Scriture al cjate in Lui significât e compiment. Il criteri par lei, scoltâ, meti in pratiche la Peraule al è Lui.

La Peraule le spieghe Lui, ma al è ancje vêr il contrari. Lu scriveve Jeronim: «*L’ignorance da la Scriture e je ignorance di Crist*». La Sacre Scriture nus fâs cognossi Gjesù, il nestri Salvadôr. Par chest al è decisif, anzit indispensabil, cognossile. Nus al domande ancje il Concili Vatican II ch’al conclût il document su la Peraule dal Signôr, la *Dei Verbum*, propi citant la frase di Jeronim.

Che l’intercession di chest sant, ch’al à dedicât la vite a la Scriture e che o podìn considerâ ancje un pôc nestri (al à stât a Aquilee...), nus fasi otignî dal Signôr la gracie implorade dal autôr dal salm: «*Ferâl pai miei pas e je la tô Peraule, lum sul gno troi*» (Salm 118/119, 105). Marie, Mari e Sûr nestre, che nus permeti di dî cun Jê: «*Ve la sierve dal Signôr: che mi sucedi secont la tô peraule*» (Lc 1,38).

Santuari di Barbane, ai 8 di Setembar dal 2019  
Fieste da la Nativitat di Marie

+ Carlo Roberto Maria Redaelli  
arcivescul